

« Le vendredy, vingtcinquiesme jour de juillet, lan mil cinq cens quarante quatre, en lhostel commun, apres midy.

« Symon Court, Claude Teste, Luxembourg de Gabiano, Andre Garbot, Anthoine Vincent, Anthoine Bonyn, maistre Jehan de Capella.

« A este ordonne que mardy prochain, Philibert Troignard, commis a la conduite des ouvraiges des rempars saint Just, et maistre Jaques Carlat, charpentier, iront a Izeron, au boys de monsieur l'arcevesque, pour veoir les boys qui seront necessaires et propres pour faire les canoyeres necessaires pour le boulevard d'Esnay, et autres boys qui seront necessaires pour les rempars, tant de saint Vincent, que saint Sebastien, et de faire les marches ainsi qu'ils verront estre au prouffict de ladicte ville. » (BB. 62.)

« Le mardy, dixiesme septembre mil cinq cens quarante quatre, en lhostel commun.

« Claude Renaud, Claude Teste, Symon Court, Luxembourg de Gabiano, Anthoine Vincent, Jehan Rochefort, Anthoyne Bonyn, Claude de Montconys, conseillers.....

« .....Pour ce que pour assister es paiemens des rempars et fortifications de ceste ville qui se font journellement en divers lieux, comme a saint Clerc, a saint Sebastien et au dessus la montaigne dudict saint Sebastien, es boulevards en sept ou huict astelliers, aussi a Esnay et a saint Just, ou il y a journellement trois mil ouvriers charpentiers, massons et mannouvriers, pareillement es payemens des gros boys et menus servant es dictz rempars et boulevards, closture et fortifications, et a faire les gasons servant au lieu de pierre, et le grand nombre de charretiers pour rendre lesdictz gasons pierre grosse et menue, areyne et chaulx sur les lieux respectivement, et a cause de la multitude convient payer en trois ou quatre lieux, scavoir :